



## Usul wang saku pelajar orang asli mungkin diluluskan

**KUALA LUMPUR** - Jabatan Kemajuan Orang Asli (Jako) sedang memperincikan cadangan menaikkan wang saku pelajar orang asli daripada RM2 ketika ini kepada RM5.

Timbalan Menteri Pembangunan Luar Bandar, Datuk Seri Abdul Rahman Mohamad berkata, bagi tujuan itu, Jako telah mengadakan bengkel garis panduan atau prosedur operasi standard dari 4 hingga 6 Disember lepas.

“Selanjutnya Jako dalam proses mengangkat Nota Jemaah Menteri (NJM) ke kementerian dalam tempoh terdekat bagi pertimbangan jemaah menteri.

“Namun begitu, ini bergantung kepada kelulusan kadar oleh pihak Kementerian Kewangan dan kedudukan kewangan semasa kerajaan,” katanya ketika menggulung perbincangan Rang Undang-undang Perbekalan 2021 di sini pada Rabu.

Sebelum ini, Senator Datuk Isa Ab Hamid dalam sesi perbincangan mencadangkan kadar wang saku pelajar orang asli dinaikkan daripada RM2 kepada RM10 sehari bagi menggalakkan kehadiran mereka ke sekolah, selain bertepatan dengan peningkatan kos sara hidup.

Sementara itu, Abdul Rahman berkata, Jako juga sedang meneliti cadangan untuk menyediakan reka bentuk khusus bagi rumah orang asli menggunakan bahan daripada sumber tempatan dengan kerjasama Lembaga Arkitek Malaysia.

Beliau berkata, jika direalisasikan, cadangan itu dijangka dapat mengurangkan kos pembinaan sekaligus membolehkan lebih banyak rumah dibina bagi mempercepatkan penyediaan rumah kepada penduduk yang memerlukan. - Bernama